

# 大乘造像功德经

唐于闐三藏法师提昙般若等奉 制译



南無本師釋迦牟尼佛


## 说明

本简体校正版《大乘造像功德经》电子书，根据《乾隆大藏经》大乘五大部外重译经第 0284 部，唐于闐三藏法师提昙般若等奉制译《大乘造像功德经》原藏影印本校正，句读仅供参考。

本电子书是免费结缘品。特此说明。

仁慧草堂

二〇二〇年一月



扫码关注仁慧草堂微信公众号

## ● 起诵仪

### 香赞

(一遍)

炉香乍爇. 法界蒙薰. 诸佛海会悉遥闻. 随处  
结祥云. 诚意方殷. 诸佛现全身.

南無香云盖菩萨摩诃萨 (合掌三称)

### 净口业真言

(三遍)

唵. 修唎修唎. 摩诃修唎. 修修唎. 萨婆诃.

### 净三业真言

(三遍)

唵. 娑嚩. 娑嚩秫驮. 娑嚩达摩娑嚩. 娑嚩秫度憾.

### 安土地真言

(三遍)

南無三满哆. 母驮喃. 唵度嚧度嚧. 地尾. 娑婆诃.

## 普供养真言

(三遍)

唵. 誝誝曩. 三婆嚩. 鞞日啰斛.

南无本师释迦牟尼佛 (合掌三称)

## 开经偈

(一遍)

无上甚深微妙法 百千万劫难遭遇  
我今见闻得受持 愿解如来真实义

# 大乘造像功德经卷上<sup>1</sup>

唐于阗三藏法师提昙般若等奉 制译<sup>2</sup>

如是我闻：

一时，佛在三十三天波利质多罗树下，与无量大比丘众及无量大菩萨众俱，弥勒菩萨摩訶萨而为上首。

尔时，世尊在彼天上，三月安居，为母说法，于诸天众多所利益，令无量诸天离苦解脱。无量诸天皆蒙法利，获大福果。时彼众中，有一天子，寿将欲尽，五衰相现，以闻法力，命终之后还生此天，永离恶道。

尔时，阎浮提中无有如来，譬如暗夜，星中无月；如国无君，如家无主，欢娱、戏乐一切都息。是时，众生孤独无依，皆于如来心怀恋慕，生大忧恼，如丧父母，如箭入心，共往世尊曾所住处，园林、庭宇悉空无佛，倍加悲恋，不能自止。

尔时，优陀延王住在宫中，常怀悲感，渴仰于佛，夫人、嫔女诸欢乐事皆不涉心，作是念言：

<sup>1</sup> 丽藏：佛说大乘造像功德经卷上

<sup>2</sup> 丽藏：大唐于阗三藏提云般若奉 制译

“我今忧悲，不久当死。云何令我未舍命间，得见于佛？”寻复思惟：“譬若有人，心有所爱，而不得见，见其住处及相似人，或除忧恼。”复更思惟：“我今若诣佛先住处，不见于佛，哀号感切，或致于死。我观世间无有一人能与如来色相、福德、智慧等者。云何令我得见是人，除其忧恼？”作是念已，即更思惟：“我今应当造佛形像，礼拜供养。”复生是念：“若我造像不似于佛，恐当令我获无量罪。”复作念言：“假使世间有智之人，咸共称扬如来功德犹不能尽，若有一人随分赞美获福无量，我今亦然当随分造。”

即时告勅国内所有工巧之人，并令来集。人既集已，而语之言：“谁能为我造佛形像，当以珍宝重相酬赏<sup>3</sup>。”

诸工巧人共白王言：“王今所勅，甚为难事。如来相好，世间无匹，我今何能造佛形像？假使毗首羯磨天而有所作，亦不能得似于如来。我若受命造佛形像，但可摸拟螺髻、玉毫少分之相，诸余相好光明威德谁能作耶？世尊会当从天下<sup>4</sup>，

<sup>3</sup> 丽藏：偿；永乐北藏及龙藏：赏

<sup>4</sup> 丽藏：来下；永乐北藏及龙藏：下

所造形像若有亏误，我等名称普<sup>5</sup>皆退失。窃共筹量，无能敢作。”

其王尔时复告之曰：“我心决定，勿有所辞！如人患渴，欲饮河水，岂以饮不能尽而不饮耶？”

是时诸人闻王此语，皆前拜跪共白王言：“当依所勅！然请大王垂许我等今夜思审，明晨就作。”复白王言：“王今造像应用纯紫栴檀之木，文理、体质坚密之者，但其形相为坐、为立、高下若何？”

王以此语问诸臣众，有一智臣前白王言：“大王！当作如来坐像。何以故？一切诸佛得大菩提，转正法轮，现大神通，降伏外道，作大佛事，皆悉坐故。是以应作坐狮子座，结跏<sup>6</sup>之像。”

尔时，毗首羯磨天遥见其事，审知王意欲造佛像，于其夜中作是思惟：“我身所解最为巧妙，世间之中无如我者。我若为作，应少似佛。”即变其身，而为匠者，持诸利器，至明清旦，住王门侧，令守门人具白王言：“我今欲为大王造像，我之工巧世中无匹，唯愿大王莫使余人。”

王闻此语心大欣庆，命之令入。观其容止，

<sup>5</sup> 丽藏：并；永乐北藏及龙藏：普

<sup>6</sup> 丽藏：加；永乐北藏及龙藏：跏

知是巧匠，便生念言：“世间之中何有此人？将非毗首羯磨天或其弟子而来此耶？”王于尔时，即脱身上所著瓔珞，手自捧持，以挂其颈，仍更许以种种无量诸珍宝物。时，王即与主藏大臣于内藏中选择香木，肩自荷负，持与天匠，而谓之言：“善哉！仁者！当用此木为我造像，令与如来形相相似。”

尔时，天匠即白王言：“我之工巧虽云第一，然造佛形相终不能尽。譬如有人以炭画日，言相似者，无有是处。设以真金而作佛像，亦复如是。有外道言：‘梵王能作一切世间，然亦不能造佛形像尽诸相好。’但我工巧世中为上，是故我今为王作耳。今晨即是月初八日，弗沙宿合毗婆诃底出现之时，佛初诞生，还有此应。此日祥庆，宜应起作。”发是语已，操斧斫木，其声上彻三十三天，至佛会所。以佛神力，声所及处，众生闻者，罪垢、烦恼皆得消除。尔时，如来即便微笑，种种叹美其王功德，乃至遥授阿耨多罗三藐三菩提记。尔时，三十三天主白佛言：“世尊！今在人间颇亦有人，曾于曩生作佛像不？”

佛言：“天主，诸有曾经作佛像者，皆于过



去已得<sup>7</sup>解脱，在天众中尚复无有，况于余处？唯有北方毗沙门子那履沙婆，曾于往昔造菩萨像，以斯福故，后得为王，名频婆娑罗。复因见我，今得生天，有大势力，永离恶道。优楼频螺迦叶、伽耶迦叶、那提迦叶并曾于往世修故佛堂，由此因缘永得解脱。憍梵波提昔作牛身，追求水草，右绕精舍，食诸草竹，因见尊容，发欢喜心，乘兹福故，今得解脱。尸毗罗曾持宝盖，供养佛像；阿菟楼驮然一支灯亦以供养；输鞞那曾扫佛堂；阿婆么<sup>8</sup>那于佛像前燃灯施明；难陀比丘爱重尊仪，香水洗沐。有如是等无量诸阿罗汉，皆悉曾于佛像之所薄申供养，乃至极下如那伽波罗，于像座前，以少许黄丹画一像身，而为供养，由此福故，皆永离苦而得解脱。天主，若复有人能于我法未灭尽来，造佛像者，于弥勒初会皆得解脱。若有众生非但为己而求出离，乃为欲得无上菩提，造佛像者，当知此则为三十二相之因，能令其人速致成佛。”

尔时，优陀延王心自思惟：“云何令我所造之像速得成就？”作是念已，语彼匠言：“汝可勤心令功速毕，使我早得瞻仰礼敬。”是时，天

<sup>7</sup> 丽藏：先已；永乐北藏及龙藏：已得

<sup>8</sup> 丽藏：摩；永乐北藏及龙藏：么

匠运其工巧，专精匪懈，不日而成。其像加趺，坐高七尺，面及手足皆紫金色。时，优陀延王见像得成，相好端严，心生净信，获柔顺忍。既得忍已，益加欣庆，所有业障及诸烦恼并得消除。譬如日出，雾露皆尽，唯除一业，现身受者，以曾于圣人起恶语故。

其王尔时即以种种珠<sup>9</sup>珍异物赏彼天匠。是时，天匠敬白王言：“王今造像，我心随喜。愿与大王同修此福。今王所赐，非我敢受。若要相与，待余吉日。”作是语已，即于其夜还升本天。

尔时，诸大国王阿阁世等，并先于佛心怀渴慕，闻王造像功已获成，皆生喜庆，共至王所，各以无量华香、音乐供养佛像，复以种种诸珍宝物赠奉于王，咸作是言：“大王！所作甚为希有，能拔我等愁忧毒箭。”

尔时，如来在彼天中为母说法，及诸天众咸得利喜，所应作事皆已作讫，复告众言：“诸天子，诸佛世尊是常住身，若诸众生有可度者，即为出现教化说法。若所作事毕，更无有能受法化者，如来于此即便不现。无智之人，谓佛实灭。如来身者，法身常身，实不灭度。诸天子，一切

<sup>9</sup> 丽藏：珠；永乐北藏及龙藏：珠

诸佛法皆如是，为化众生有现、不现。”

尔时，如来复作是言：“汝等当知！此诸天众所应度者，皆已度讫，吾今将欲下阎浮提。汝等诸天若念我者，当勤精进，勿复放逸。所以者何？放逸过失故，令汝等不得阿耨多罗三藐三菩提。然汝等以于往昔曾种善根，今得在此受天快乐，便著放逸，不修福行。此诸快乐，无常所随，一从殒<sup>10</sup>坠，长沦恶道。又汝等诸天烦恼尤重，见有胜己，便生嫉妬，曾不念言：‘彼天胜乐由多福业之所感致，我若勤修必亦当得。’又今汝等身色光泽，如日初辉，若怀嫉妬，心黯如死炭，复当令堕大黑暗中，乃至不能自见手掌，后复当作食吐之鬼。又汝等诸天受众福报，身相严洁，威势勇猛，由嫉妬故，当受女身，永失丈夫威猛之力。

“诸天子，我念昔者有无量诸王，皆为汝等嫉妬之心非理所害。诸天子，昔有阿修罗王名曰邬罗，修行苦行，戒品清洁，而汝诸天等遣一天女，名邬婆尸，惑彼王心，令亏净行。其王染著，威德损减，被那罗延天之所杀害，并无量阿修罗众同时败灭。其那罗延天既杀此王，又诛其众，

<sup>10</sup> 丽藏：陨；永乐北藏及龙藏：殒

因即收取邬婆尸女，而往天宫。复有一王，名曰那诃受，汝等诸天诳惑之语，助诸天众伐阿修罗。修罗破已，汝等诸天反加其害。又汝等诸天以舍支夫人故，心生忿妬，构行谗毁，令阿伽娑仙人无故被嫌，而兴恶愿。又汝等诸天曾为诳惑，谓瞿荼王曰：‘仙人之处，多有真金。’王信此言，逼之令出，仙人由是心生愤恚，即时猛火烧杀其王。昔复有王，名曰提婆，**当**<sup>11</sup>设大会，以为供养，以斯福业威力自在，上此天中，受天快乐。汝诸天等，心怀嫉妬，令从忉利退堕阎浮，所有威势并皆丧失，如月无光，如河无水。诸天子，世中有人威德自在，或得诸定，或得神通，或有成就四神足等，若起一念嫉妬之心，如是功德一时退失。如提婆达多愚痴厚重，乃于我所生嫉妬意，即时自失五种神通。”

尔时，天帝释白佛言：“世尊！我今有疑，欲有所问。言嫉妬者，云何是耶？”复作是言：

“世尊！若有众生见他胜己，生如是念：‘云何令我获彼所得？’如是之心，是嫉妬不？”

佛言：“不也！此是贪心，非为嫉妬。天主，其嫉妬者，自求名利，不欲他有，于有之人而生

<sup>11</sup> 丽藏：尝；永乐北藏及龙藏：当

憎恚，是为嫉妬。”

尔时，诸天众皆从座起，右膝著地，合掌向佛，而作是言：“如佛所诲，我诸天众皆当奉行。如来、世尊为父、为主、为尊重者、为最胜者，能于我等起大慈悲而来至此，令诸天众皆得利益。我等所愿，犹为未满足，欲于如来重请一事。世尊！世间之人于我等诸天多生轻慢。何以故？以诸佛如来人中生故，复于人中成正觉故；人中多有诸阿罗汉而得果故；诸大威德、辟支佛复于人间而出现故。如来今者，若不住此，下阎浮提，世间之人谓我等诸天，不知如来有大威德，应受诸天如法供养，复谓我等不能供养诸佛世尊。唯愿如来少住于此，受我微供，令彼人间知我等诸天供养于佛。”于时，世尊默然许可。

尔时，佛告大目犍<sup>12</sup>连：“汝可先往阎浮提，问讯四众，作如是言：‘一切众生忆念我者，咸应集会僧伽尸国，却后七日，皆当见我。’”

尔时，大目犍<sup>13</sup>连顶礼佛足，礼佛足已，如一瞬顷到阎浮提，以佛所勅告诸四众。时，优陀延王等及一切众生，闻佛此言，若身若心欢喜踊跃，皆除忧恼，普得清凉。

<sup>12</sup> 丽藏：犍；永乐北藏及龙藏：犍

<sup>13</sup> 丽藏：犍；永乐北藏及龙藏：犍

尔时，四众比丘、比丘尼、优婆塞、优婆夷欲共往诣僧伽尸国，并先来集王舍城中，互相谓言：“如来世尊下阎浮提，谁能先得恭敬礼拜，法未尽来恒为上首！”

尔时，摩诃迦旃延闻此语已，心怀不悦，恐比丘尼得为上首。何以故？彼众之中，有优波难陀、莲华色二比丘尼，善能通达诸佛法藏，所得神通唯除目连更无等故。作是念已，种种诃责比丘尼众。

时，莲华色比丘尼告诸尼言：“我等女人，在于俗间常被尊贵，纵使种族卑贱之者，仍得丈夫恭敬、礼重、承事、供养。又佛法中诸比丘尼，父母、眷属多是王种，精进持戒，不犯威仪，具诸德业，仍令礼敬初戒比丘。又尊者迦旃延，今复作此种种诃责。我为汝等设诸方便，令比丘尼出过于彼。”作是语已，与诸四众即便<sup>14</sup>往赴僧伽尸城。

尔时，波斯匿王、阿闍世王及毗舍离国严炽王等，各将四兵，前后导从，有大势力，所乘象马，皆以种种宝物庄严，幡盖、香华并众妓乐，威容肃穆，状若诸天，皆亦往诣僧伽城所。

<sup>14</sup> 丽藏：时；永乐北藏及龙藏：便

尔时，优陀延王严整四兵以为侍从，乘大白象珍宝绮饰，躬自荷戴所造之像，华幡音乐随逐供养，从其本国向僧伽尸城。

尔时，毗首羯磨天并诸天众，知佛将欲下阎浮提，作三道宝阶，从僧伽尸城至忉利天，其阶中道琉璃所成，两边阶道悉用黄金，足所践处布以白银，诸天七宝而为间饰。

尔时，帝释遣使往诣夜摩天、兜率陀天、化乐天、他化自在天及于梵世，而告之曰：“如来不久下阎浮提。欲有供养，愿来至此。”复遣使往四大<sup>15</sup>王天、大海龙王、犍<sup>16</sup>闍婆、紧那罗、夜叉等众，而谓之言：“世尊今欲下阎浮提，可持所有来此供养。”时彼诸天及龙、神等闻此语已，靡不云集忉利天中。

尔时，世尊在须弥山顶，与诸天众将欲下时，一切诸天前后翼从，威德炽盛，光明赫奕<sup>17</sup>，如满月在空中，众星共绕；如旭日初出，彩霞纷映。时佛众会，其状如是。

尔时，阎浮提中，以佛威神有五种希有之事：一者，令彼诸天不见人间不净之物；二者，令诸

<sup>15</sup> 丽藏：天；永乐北藏及龙藏：大

<sup>16</sup> 丽藏：犍；永乐北藏及龙藏：犍

<sup>17</sup> 丽藏：奕；永乐北藏及龙藏：弈

女人见彼天男而无欲想；三者，亦令丈夫见诸天女不生染意；四者，令于人间遥见诸天种种供养；五者，诸天身光洁白细妙，非人所覩，以佛神力显然明著，皆可得见。

尔时，世尊从天初下，足蹈宝阶。梵王在右，手执白盖；帝释在左，手持白拂。其余诸天皆乘虚空，随佛而下，一时同奏种种音乐，各自捧侍<sup>18</sup>幢幡、宝盖，散华供养。净居天众<sup>19</sup>塞虚空，无量百千诸天婁女持宝珠、瓔珞歌赞佛德。复有诸天于虚空中雨种种香及种种华，诸龙雨于微细香雨。于时空中净无云暘，雷声美妙，闻者喜悦。犍<sup>20</sup>闍婆神、紧那罗神奏提婆那伽微妙之曲，歌赞如来本生之事。

于时，阎浮提内王及臣、人并四众等，周匝遍满僧伽尸城，或散香华，或持幡盖，吹螺击鼓，种种音乐向空供养，举手合掌，瞻仰于佛。人天名华，上下交散，缤纷而下，积至于膝。诸外道众见斯事者，咸亦发心，归依礼敬。

尔时，世尊足蹈宝阶，次第而下，至于半路。四天王天即于其所，广设供养。此供殊妙，劫初

<sup>18</sup> 丽藏：持；永乐北藏及龙藏：侍

<sup>19</sup> 丽藏：侧；永乐北藏及龙藏：曼

<sup>20</sup> 丽藏：犍；永乐北藏及龙藏：犍



已来，未曾有也！

尔时，如来受天供毕，复与大众巡阶而下，至最下级，欲践地时，其莲华色比丘尼即变其身，作转轮王，领四种兵七宝前导，从空来下，疾至佛所。诸国王等各兴是念：“此转轮王从何所来？”于时，尊者须菩提在自房中见佛下来，即整衣服，遥申礼敬。时，莲华色比丘尼舍轮王身，还复本形，遽即顶礼佛世尊足。

尔时，世尊种种呵责彼比丘尼，而谓之曰：“汝今知不，须菩提已先礼我？汝得谁教，变作轮王？汝得预出家，受具足戒，已过其分。汝智慧微少，谄诈无边，慈悲报恩，如露一滴。岂能于我法中而为上首？”

时，莲华色比丘尼闻佛教诲，深生愧耻，即白佛言：“世尊！我今自知为过不少，从今以往，不敢复更变现神通！”

尔时，阎浮提内国王、大臣并四部众，皆以所持种种供具供养于佛。时，优陀延王顶戴佛像，并诸上供珍异之物，至如来所而以奉献。佛身相好，具足端严，在诸天中殊特明显，譬如满月离众云曠。所造之像而对于佛，犹如堆阜比须弥山，不可为喻，但有螺髻及以玉毫少似于佛，而令四

众知是佛像。

尔时，优陀延王白佛言：“世尊！如来过去于生死中为求菩提，行无量无边难行苦行，获是最上微妙之身无与等者，我所造像不似于佛，窃自思惟，深为过咎。”

尔时，世尊告彼王言：“非为过咎。汝今已作无量利益，更无有人与汝等者。汝今于我佛法之中初为轨则，以是因缘故，令无量众生得大信利。汝今已获无量福德、广大善根。”

时，天帝释复告王言：“王今于此勿怀忧惧，如来先在天上及此人间，皆称赞于王造像功德，凡诸天众悉亦随喜。未来世中有信之人，皆因王故，造佛形像而获大<sup>21</sup>福，王今宜应欢喜自庆。”

大乘造像功德经卷上<sup>22</sup>

<sup>21</sup> 丽藏：胜；永乐北藏及龙藏：大

<sup>22</sup> 丽藏：佛说大乘造像功德经卷上

# 大乘造像功德经卷下<sup>23</sup>

唐于阗三藏法师提昙般若等奉 制译<sup>24</sup>

尔时，世尊于僧伽尸道场坐师子座。时诸四众心各念言：“我等愿闻如来演说造像功德。若有众生作佛形像，设不相似，得几所福？”

尔时，弥勒菩萨摩訶萨知其念，即从座起，偏袒右肩，长跪合掌，白佛言：“世尊！今优陀延王造佛形像，若佛在世，若已涅槃，其有信心能随造者，所获功德，唯愿世尊广说其相。”

佛告弥勒菩萨言：“弥勒，谛听！谛听！善思念之！当为汝说。若有净信善男子、善女人，于佛功德专精系念，常观如来威德自在，具足十力、四无所畏、十八不共法、大慈大悲、一切智智、三十二种大人之相、八十随形好，一一毛孔皆有无量异色光明、百千亿种殊胜福德庄严成就、无量智慧，明了通达无量三昧、无量法忍、无量陀罗尼、无量神通。如是等一切功德皆无有量，离众过失，无与等者。此人如是谛念思惟，深生信乐，依诸相好而作佛像，功德广大，无量无边，

<sup>23</sup> 丽藏：佛说大乘造像功德经卷下

<sup>24</sup> 丽藏：大唐于阗三藏提云般若奉 制译

不可称数。

“弥勒，若有人以众杂彩而为绩饰，或复镕铸金、银、铜、铁、铅、锡等物，或有雕刻栴檀香等，或复杂以真珠、螺贝、锦绣织成，丹土、白灰、若泥、若木如是等物，随其力分而作佛像，乃至极小如一指大，能令见者知是尊容。其人福报，我今当说。

“弥勒，如是之人于生死中虽复流转，终不生贫穷之家，亦不生于边小国土、下劣种姓、孤独之家，又亦不生迷戾车等商估、贩货<sup>25</sup>、屠脍等家，乃至不生卑贱技<sup>26</sup>巧、不净种族、外道苦行、邪见等家；除因愿力，并不生彼。是人常生转轮圣王，有大势力种姓之家，或生净行婆罗门，富贵自在无过失家。所生之处，常遇诸佛，承事供养。或得为王，能持正法，以法教化，不行非道。或作转轮圣王，七宝成就，千子具足，腾空而行，化四天下，尽其寿命，自在丰乐。或作帝释、夜摩天王、兜率天王、化乐天王、他化自在天王，人、天快乐靡不皆受，如是福报相续不绝。所生之处，常作丈夫，不受女身，亦复不受黄门、二形卑贱之身。所受之身，无诸丑恶，

<sup>25</sup> 丽藏：赁；永乐北藏及龙藏：货

<sup>26</sup> 丽藏：伎；永乐北藏及龙藏：技

目不盲眇，耳不聋聩，鼻不曲戾，口不喎斜，唇不下垂，亦不皴涩，齿不踈缺，不黑不黄，舌不短急，项无瘤瘿，形不伛偻，色不斑驳，臂不短促，足不癭跛，不甚瘦，不甚肥，亦不太长，亦不太短，如是一切不可喜相悉皆无有。其身端正，面貌圆满，发紺青色，软泽光净，唇如丹果，目若青莲，舌相广长，齿白齐密，发言巧妙，能令闻者无不喜悦。臂肘**肱**<sup>27</sup>长，掌平坦厚，腰髀充实，胸臆广大，手足柔软，如兜罗绵，诸相具足无所缺减，如那罗延天有大筋力。

“弥勒，譬如有人堕圜厕中，从彼得出，刮除粪秽，净水洗沐，以香涂身，著新洁衣。如是此人，比在厕中犹未得出，净秽香臭相去几何？此事悬隔，无有等倍。弥勒，若有人于生死中，能发信心造佛形像，比未造时相去悬隔，亦复如是。当知此人在在所生净除业障，种种**技**<sup>28</sup>术无师自解。虽生人趣，得天六根；若生天中，超越众天。所生之处无诸疾苦，无疥癩，无痈疽，不为鬼魅之所染著。无有癫狂、干瘠等病，**疔**<sup>29</sup>疔、症瘕、恶疮、隐疾、吐痢无度、饮食不消、举体

<sup>27</sup> 丽藏：侷；永乐北藏及龙藏：肱

<sup>28</sup> 丽藏：伎；永乐北藏及龙藏：技

<sup>29</sup> 丽藏：瘡；永乐北藏及龙藏：疔

酸疼、半身痿蹇如是等病，四<sup>30</sup>百四种，皆悉无有。亦复不为毒药、兵仗、虎、狼、师子、水、火、怨贼如是横缘之所伤害，常得无畏，不犯诸罪。

“弥勒，若有众生，宿造恶业，当受种种诸苦恼事，所谓枷锁杻械、打骂烧炙、剥皮拔发、反系高悬，乃至或被分解支节，若发信心，造佛形像，如是苦报皆悉不受。若寇贼侵扰，城邑破坏，恶星变怪，饥馑疾疫如是之处，不生其中。若言生者，斯则妄说。”

尔时，弥勒菩萨摩訶萨复白佛言：“世尊！如来常说善、不善业皆不失坏。若有众生作诸重罪，当生卑贱种姓之家，贫穷疾苦，寿命夭促。后发信心，造佛形像，此众罪报为更当受？为不受耶？”

佛告弥勒菩萨言：“弥勒，汝今谛听！当为汝说。若彼众生作诸罪已，发心造像，求哀忏悔，决定自新<sup>31</sup>，誓不重犯，先时所作皆得销灭。我今为汝广明此事。弥勒，譬若有人宿行悭吝，以是缘故，受贫穷苦，无诸财宝，资用匱乏。忽遇比丘先入灭定，从定初起，即以饮食恭敬奉施，

<sup>30</sup> 丽藏：四；永乐北藏：四；龙藏：曰；校勘：四

<sup>31</sup> 丽藏：断；永乐北藏及龙藏：新

此人施已永舍贫穷，凡有所须悉如其意。弥勒，彼贫穷人，先世恶业及所得报，今何在耶？”

弥勒菩萨言：“世尊！由施食故，先世恶业皆悉灭尽，永离贫穷，大富充足。”

佛言：“弥勒，如汝所言，当知此人亦复如是。由造像故，彼诸恶业永尽无余，所应受报皆不复受。弥勒，业有三种：一者，现受；二者，生受；三者，后受。此三种业中，一一皆有定与不定。若人信心，造佛形像，唯现定业少分容受，余皆不受。”

尔时，弥勒菩萨摩诃萨复白佛言：“世尊！如来常说有五种业最为深重，决定堕于无间地狱，所谓杀父、害母、杀阿罗汉、以恶逆心出佛身血、破和合僧。若有众生先作此罪，后于佛所生净信心，造佛形像，此人为更堕于地狱？为不堕耶？”

佛告弥勒菩萨言：“弥勒，我今为汝重说譬喻。如或有人手执强弓，于树林中<sup>32</sup>向上射叶，其箭彻往，曾无所碍。若有众生犯斯逆罪，后作佛像，诚心忏悔，得无根信，我想微薄，虽堕地狱还即出离，如箭不停，此亦如是。又如比丘得

<sup>32</sup> 丽藏：间；永乐北藏及龙藏：中

神足通，从海此岸到于彼岸，周旋四洲，无能碍者。此人亦尔，由先所犯暂堕地狱，非彼宿业所能为碍。”

尔时，弥勒菩萨摩诃萨复白佛言：“世尊！诸佛如来是法性身，非色相身。若以色相为佛身者，难陀比丘与转轮圣王皆应是佛，以悉具有诸相好故。或有众生坏佛法身，法说非法，非法说法，后发信心而造佛像，此之重罪为亦销灭？为不得灭？”

佛告弥勒菩萨言：“弥勒，若彼众生，法说非法，非法说法，唯以口言而不坏见，后生信乐，造佛形像，此先恶业但于现身而受轻报，不堕恶道，然于生死未即解脱。”

尔时，弥勒菩萨摩诃萨复白佛言：“世尊！若有人盗佛塔物，盗僧祇物、四方僧物、现前僧物，自用与人，如己物想。世尊常说用佛塔物及僧物者其罪甚重。然彼众生作是罪已，深自悔责，起净信心而造佛像，如是等罪为灭不耶？”

佛告弥勒菩萨言：“弥勒，若彼众生曾用此物，后自省察，深怀愧悔，依数酬倍，誓更不犯。我今为汝说一譬喻，如有贫人，先多负债，忽遇伏藏，得无量宝，还其债已，长有余财。当知此



人亦复如是，酬倍彼物，又造佛像，免诸苦患，永得安乐。”

尔时，弥勒菩萨摩诃萨复白佛言：“世尊！如佛所说，于佛法中犯波罗夷不名为生。或复有人作斯罪已，发心忆念诸佛功德而造佛像，于佛法中得再生不？又于今生、第二、第三、第四生中，获证法不？”

佛告弥勒菩萨言：“弥勒，譬如有人，身被五缚，若得解脱，如鸟出网，至无碍处。此人亦尔，若发信心，念佛功德而造佛像，一切业障皆得消除，于生死中速出无碍。弥勒当知，乘有三种，所谓声闻乘、独觉乘及以佛乘。此人随于何乘而起愿乐，即于此乘而得解脱。若但为成佛，不求余报，虽有重障而得速灭，虽在生死而无苦难，乃至当证无上菩提，获清净土，具诸相好，所得寿命常无有尽。”

尔时，会中有未发大乘心者，皆生疑念：“如来过去为造佛像？为不作耶？设若作者，云何寿命而有限极、有病有苦？所居国土多诸秽浊，不得清净？”

时，波斯匿王承佛威神，即从座起，长跪合掌，白佛言：“世尊！我见如来诸根相好，及以

种族皆悉第一，其心决定，无有所疑。然佛世尊曾于一时，被佉陀罗木刺伤其足；又于一时遇提婆达多推山进石，伤足出血；昔复一时唱言有病，命遣耆婆调下痢<sup>33</sup>药；又一时中曾患背痛<sup>34</sup>，令摩诃迦叶诵七菩提分，所苦得除；复于一时曾有所患，使阿难陀往婆罗门家，乞求牛乳；往复一时于婆<sup>35</sup>罗村中，三月安居唯食马麦；复曾一时乞食不得，空钵而还。如世尊言：‘若有人作佛像者，所有业障皆得除灭，离众苦恼，无诸疾病。’世尊往昔为曾作像？为不曾作？若于昔时作佛像者，何因而有如是等事？”

佛告波斯匿王言：“谛听！谛听！善思念之！当为大王分别解说。大王，我于往世为求菩提，以众宝、栴檀、彩画等事而作佛像，过此会中人天之数。以斯福故，虽在生死未尽诸惑，然所受身坚如金刚，不可损坏。大王，我念过去于无量劫生死之中造佛形像，尔时尚有贪瞋等无量烦恼而共相应，然未曾于一念之间以罪业故，有四大不调及恶鬼神诸少病苦，所须之物莫不充备，况我于今已得阿耨多罗三藐三菩提，而有如是不如

<sup>33</sup> 丽藏：利；永乐北藏及龙藏：痢

<sup>34</sup> 丽藏：病；永乐北藏及龙藏：痛

<sup>35</sup> 丽藏：娑；永乐北藏及龙藏：婆

意事？大王，若我昔时曾作佛像，今有残业受斯报者，我复云何作无畏说，言造佛像决定能尽诸恶业耶？大王，我于过去给施无量饮食、财宝，云何今时乞求不得而食马麦？<sup>36</sup> 倘令此事而有实者，云何我于无量经中种种赞叹檀波罗蜜，说其福业终不虚也？大王，我是真实语者，不诳语者。我若欺诳，况余人乎？大王，我已久断一切恶业，能舍难舍，能行难行，所舍身命过百千亿，已造无量诸佛形像，已悔无量诸罪恶业，岂得有斯毁伤、病苦、食噉马麦、饥渴等事？若曾得胜果，今还退失，何假劝修此众福善？大王，诸佛如来常身法身，为度众生故现斯事，非为实也！伤足、患背、乞乳、服药，乃至涅槃，以其舍利分布起塔，皆是如来方便善巧，令诸众生见如是相。大王，我于世间现<sup>37</sup> 如是众患事者，欲示众生业报不失，令生怖畏，断一切罪，修诸善行，然后了知常身、法身寿命无限，国土清净。大王，诸佛如来无有虚妄，纯一大悲，智慧善巧，故能如是种种示现。”是时，波斯匿王闻此说已，欢喜踊跃，与无量百千众生，皆发阿耨多罗三藐三菩提心。

<sup>36</sup> 丽藏：今；永乐北藏及龙藏：令

<sup>37</sup> 丽藏：于如是；永乐北藏及龙藏：如是

尔时，弥勒菩萨摩诃萨复白佛言：“世尊！有诸女人志意狭小，多怀嫉恚，轻薄谄曲，有恨不舍，知恩不报，设求菩提莫能坚守，常欲诳惑一切众生，亦复为他之所诳惑。世尊！若此女人造佛形像，如是诸业得除灭不？当来得作勇健丈夫，求佛果不？得作知恩报恩人不？得具智慧大慈悲不？于生死法能厌离不？除因愿力得更不受女人之身，如瞿昙弥及佛母摩耶夫人不？”

佛告弥勒菩萨言：“弥勒，若有女人能造佛像，永不复受女人之身。设受其身，则为女宝，尊胜第一。然诸女人有五种德，此女所得出过诸女。何等为五？一者，生孕子息；二者，种族尊贵；三者，禀性贞良；四者，质相殊绝；五者，姿容美正。

“弥勒，一切女人有八种因缘，恒受女身。云何为八？一者，爱好女身；二者，贪著女欲；三者，口常赞美女人容质；四者，心不正直，覆藏所作；五者，厌薄自夫；六者，念重他人；七者，知人有恩而已背逆；八者，邪伪庄饰，欲他迷恋。若能永断如是八事而造佛像，乃至成佛常作丈夫，更受女身无有是处。

“弥勒，有四种因缘，令诸男子受女人身。

何等为四？一者，以女人声，轻笑唤佛及诸菩萨一切圣人；二者，于净持戒人，以诽谤心说言犯戒；三者，好行谄媚，诳惑于人；四者，见他胜己，心生嫉妬。若有丈夫行此四事，命终之后必受女身，复经无量诸恶道苦。若深发信心，悔先所作而造佛像，则其罪皆灭，必更不受女人之报。

“弥勒，有四种因缘，令诸男子受黄门身。何等为四？一者，残害他形乃至畜生；二者，于持戒沙门瞋笑、谤毁；三者，情多贪欲，故心犯戒；四者，亲犯戒人，复劝他犯。若有男子先行此事，后起信心造佛形像，乃至成佛不受斯报，常作丈夫，诸根具足。

“弥勒，有四种业，能令丈夫受二形身，一切人中最为其下。何等为四？一者，于尊敬所而有烝秽；二者，于男子身非处染著；三者，即于自己而行欲事；四者，**衒**<sup>38</sup>卖女色而与他人。若有众生曾行此事，深自咎责，悔先所犯，起净信心，造佛形像，乃至成佛不受此身。

“弥勒，复有四缘，令诸男子其心常生女人爱欲，乐他于己行丈夫事。何等为四？一者，或

<sup>38</sup> 丽藏：詒；永乐北藏及龙藏：衒

嫌或戏，谤毁于人；二者，乐作女人，衣服庄饰；三者，于亲族女行淫秽事；四者，实无胜德，妄受其礼。以此因缘，令诸丈夫起于如是别异烦恼。若悔先犯，更不造新，心生信乐，作佛形像，其罪既灭，此心亦息。

“弥勒，有五种慳，能坏众生。何等为五？一者，慳惜所住邻邑，由此当于旷野中生；二者，慳惜所居宅宇，当作虫<sup>39</sup>身，恒居粪秽；三者，慳惜端正好色，当感丑恶不如意形；四者，慳惜所有资财，当受贫穷，衣食乏少；五者，慳惜所知之法，当有顽钝畜生等报。若悔己先业，造佛尊仪，则永离慳心，无前所受。

“弥勒，复有五缘，令诸众生生边夷之处及无佛法时。何者为五？一者，于三宝良田不生净信；二者，背实亏理，妄行教诫；三者，不如理实而有教授；四者，破和合僧，令成二部；五者，极少乃至破二比丘，令不和合。若永断斯业，造佛形像，则常遇佛兴，恒闻法要。

“弥勒，众生复有五种因缘，常被于人之所厌逐，乃至至亲亦不喜见。云何为五？一者，两舌；二者，恶口；三者，多诤；四者，多瞋；五

<sup>39</sup> 丽藏：蛊；永乐北藏及龙藏：虫

者，巧说相似之言，以行诽谤。后若发心造佛形像，悔先恶业，誓不重作，其所作罪并得除灭，为一切人之所爱敬。何以故？诸佛有无量无边胜福德故、无量无边大智慧故、无量无边三昧解脱等种种希有功德法故。

“善男子，假使有人以三千大千国土<sup>40</sup>抹为微尘。复碎彼尘，一一尘分等彼三千大千国土微尘之数，有如是等碎微尘数三千大千国土。设复有人取一碎尘，以神通力往于东方，一刹那顷过彼所碎微尘数三千大千国土，第二、第三后后刹那皆亦如是，乃至终彼碎尘数劫，彼诸劫中所有刹那，一一刹那各为一劫，经尔许劫刹那刹那，皆度如前碎微尘数三千大千国土。如是毕已，乃下此尘。是人还来，更取一尘，复往东方过前一倍，下尘而返，至第三尘，倍于第二。如是次第转倍于前，乃至尽此碎微尘数。如说东方，南、西、北方皆亦如是。是人四方所经之处，一切国土尽末为尘。此诸微尘，一切众生共<sup>41</sup>校计筹量，容可知数；于如来身一毛孔分所有功德，不可知也！何以故？诸佛如来所有功德无有限量，不思議故。

<sup>40</sup> 丽藏：末；永乐北藏及龙藏：抹

<sup>41</sup> 丽藏：校；永乐北藏及龙藏：校

“善男子，假使如前微尘等数舍利弗等所有智慧，不及如来一念之智。何以故？如来于念念中常能出现过前尘数三昧、解脱、陀罗尼等种种无量胜功德故，诸佛功德，一切声闻、辟支佛，于其名字亦不能知。是故若有净信之心，造佛形像，一切业障莫不除灭，所获功德无量无边，乃至当成阿耨多罗三藐三菩提，永拔众生一切苦恼。”

佛说此经已，弥勒菩萨及三十三天，优陀延王，一切世间天、人、阿修罗、乾闥婆等，闻佛所说，皆大欢喜，信受奉行。

大乘造像功德经卷下<sup>42</sup>

<sup>42</sup> 丽藏：佛说大乘造像功德经卷下



## ● 结诵仪

### 补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

### 补阙圆满真言

(三遍)

唵. 呼嚧呼嚧. 社曳穆契. 莎诃.

### 普回向真言

(三遍)

唵. 娑麼囉. 娑麼囉. 弭麼曩. 萨嚩诃. 摩诃斫迦囉嚩吽.

南無佛 南無法 南無僧 (合掌三称)

南無本师释迦牟尼佛 (合掌三称)

南無观世音菩萨摩诃萨 (合掌三称)

南無护法诸天菩萨 (合掌三称)

## 礼佛发愿文

(一遍)

归命十方调御师 演扬清净微妙法  
三乘四果解脱僧 愿赐慈悲哀摄受

但(某甲)自违真性，枉入迷流。随生死以飘沉，逐色声而贪染。十缠十使，积成有漏之因；六根六尘，妄作无边之罪。迷沦苦海，深溺邪途。著我耽人，举枉措直。累生业障，一切愆尤。仰三宝以慈悲，沥一心而忏悔。

所愿能仁拯拔，善友提携。出烦恼之深源，到菩提之彼岸。此世福基命位，各愿昌隆；来生智种灵苗，同希增秀。生逢中国，长遇明师。正信出家，童真入道。六根通利，三业纯和。不染世缘，常修梵行。执持禁戒，尘业不侵。严护威仪，蜎飞无损。不逢八难，不缺四缘。般若智以现前，菩提心而不退。修习正法，了悟大乘。开六度之行门，越三祇之劫海。建法幢于处处，破疑网于重重。降伏众魔，绍隆三宝。承事十方诸佛，无有疲劳。修学一切法门，悉皆通达。广作福慧，普利尘沙。得六种之神通，圆一生之佛果。然后不舍法界，遍入尘劳。等观音之慈心，行普

贤之愿海。他方此界，逐类随形。应现色身，演扬妙法。泥犁苦趣，饿鬼道中，或放大光明，或现诸神变，其有见我相，乃至闻我名，皆发菩提心，永出轮回苦。火镬冰河之地，变作香林；饮铜食铁之徒，化生净土。披毛戴角，负债含怨，尽罢辛酸，咸沾利乐。疾疫世而现为药草，救疗沉痾；饥馑时而化作稻粱，济诸贫馁。但有利益，无不兴崇。次期累世冤亲，现存眷属，出四生之汨没，舍万劫之爱缠。等与含生，齐成佛道。虚空有尽，我愿无穷。情与无情，同圆种智。

## 回向偈

(一遍)

愿以此功德 庄严佛净土  
上报四重恩 下济三途苦  
若有见闻者 悉发菩提心  
尽此一报身 同生极乐国

十方三世一切佛。一切菩萨摩訶萨。摩訶般若波罗蜜。

## 三皈依

(一遍)

自皈依佛，当愿众生，体解大道，发无上心；  
自皈依法，当愿众生，深入经藏，智慧如海；自  
皈依僧，当愿众生，统理大众，一切无碍。和南  
圣众。



此咒置经书中可灭误跨之罪

南无护法韦驮尊天菩萨

